

欽  
定  
全  
唐  
文

欽定全唐文卷六百二十七目錄

呂溫三

簡獲隱戶奏

代鄭相公謝賜門戟狀

代伊僕射奏請女正度狀

代鄭相公請刪定施行六典開元禮狀

代都監使奏吐蕃事宜狀

代李中丞薦道州刺史呂溫狀

功臣恕死議

復漢以粟爲賞罰議

請立舜廟奏

代竇中丞與襄陽于相公書

代李侍郎與山南嚴僕射書

代李侍郎與徐州張尚書書

代辛將軍與普潤劉尚書書

代李侍郎與宣武韓司空書

上族叔齊河南書

與族兄皋請學春秋書

欽定全唐文卷六百二十七

呂溫三

簡獲隱戶奏

當州舊額戶一萬八千四百七除貧窮死絕老幼單孤不  
支濟等外堪差科戶八千二百五十七臣到後團定戶稅  
次簡責出所由隱藏不輸稅戶一萬六千七百伏緣聖恩  
錄臣在道州微效擢授大郡令撫傷殘臣昨尋舊案詢問  
閭里承前徵稅並無等第又二十餘年都不定戶存亡孰  
察貧富不均臣不敢因循設法團定簡獲隱戶數約萬餘

州縣雖不增徵科所由已私自率斂與其潛資於奸吏豈若均助於疲人臣請作此方圓以救凋瘵庶得下免偏苦上不闕供

代鄭相公謝賜門戟狀

門戟十二竿右今日中使某乙至臣私第奉宣聖旨賜臣前件戟者臣伏以國朝之制名器尤慎吏考三十始秩銀青戰勳十二乃號柱國必資具美方錫殊榮於是有命服以朝加戟於戶將勸勞而責實亦馭貴而崇名上無謬恩下不虛受臣迹非奇致擢自諸生先皇以廉謹賜知密勿

踰於一紀陛下以勤憂過聽委遇首於羣僚叨據樞衡亟  
移星歲雷霆用武曾無犬馬之勞日月垂文豈有螢燭之  
助徒以侍祠清廟拜舞鴻名累逢慶賚驟假勳秩禮異其  
數物盛其容新其閑闕賜之榮戟衡門燕雀乍相賀於朱  
楹武庫龍蛇忽追飛於陋巷焜耀當代寵靈自天聚族知  
慚殺身匪報無任荷懼屏營之至謹奉狀陳謝以聞

代伊僕射奏請女正度狀

光祿大夫尚書右僕射南兗郡王臣女請度尼

某乙

右臣伏以陛下降誕之辰率土蒙幸臣於含氣之內獨受  
深恩思所以稱慶南山獻心北極遂割骨肉之愛俾歸空  
寂之門結幽願於金仙奉勝因於寶壽冒昧上請精誠匪  
他陛下以釐革初行渙汗無反憐臣罄至之分事與恩違  
念臣愚魯之忠貸於法外特降中使俯加慰諭臣忝居端  
右之地首干畫一之科誠雖奉上義乖率下合當嚴譴忽  
被殊私震驚失圖慚跼罔據荷降鑒之明原情斯在蒙曲  
全之澤爲感則深輒瀆宸嚴伏增隕越謹奏

代鄭相公請刪定施行六典開元禮狀

右臣聞化人成俗莫大於禮樂垂統建中必資於制度然而忠敬有弊質文異數羣儒之得失蜂起歷代之沿革絲棼或榮古而陋今名實交喪或違經而便事本末相忘或煩雜以爲詳或濶略以爲要未聞折衷以叶通方國家與天惟新改物視聽太宗拯焚溺之餘纍立統紀元宗承富庶之後方暇論思爰敕宰臣將明睿旨集儒賢於別殿考古訓於祕文以論材審官之法作大唐六典三十卷以道德齊禮之方作開元新禮一百五十卷網羅遺逸芟翦奇邪亘百代以旁通立一王之定制草奏三復祇令宣示中



外星周六紀未有明詔施行遂使喪祭冠婚家猶異禮等  
威名分官靡成規不時裁正貽弊方遠伏惟睿聖文武皇  
帝陛下恢纂鴻業允升大猷雷霆奮有截之威日月廓無  
私之照三叛就戮四夷來賓牛馬放於農郊兵革藏於武  
庫嚴禋上帝祇受鴻名惟懷永圖不自滿假昧爽聽政子  
夜讀書處成功而弗休率至理若不及每懷經始則知貞  
觀之難言念持盈思復開元之盛臣謬忝密務兼掌圖籍  
無能輔弼已負於恩私有所建明豈先於典禮伏見前件  
開元禮六典等聖朝所制鬱而未用奉揚遺美允屬欽明

然或損益之間討論未盡或張弛之際宜稱不同將貽永代之規必俟不刊之妙臣請於常參官內選學藝優深理識通遠者三五人就集賢院各盡異同量加刪定然後敢塵睿覽特降德音明下有司著爲恆式使公私共守貴賤遵行苟有愆違必正刑憲如此則職官有制將興濟濟之詩風俗大同坐致熙熙之詠見可而獻知無不爲輒瀆宸嚴伏增隕越謹狀

代都監使奏吐蕃事宜狀

右臣前月十四日至清水縣西吐蕃舍人郭至崇來迎便

請將書詔先去臣以二十一日到薄寒山西去蕃帥帳幕二十餘里停止至二十三日方見尚綺里徐撥布論乞心熱奉宣進止兼付賜物莫不祇奉聖恩感悅過望部落歡朴道路謳歌加以接待殷勤供億豐厚竭誠歸化形狀可知臣親覩蕃情不勝慶躍綺里徐等固欲令臣與薛仵領蕃使卻歸奏事臣當時苦爭請赴衙帳自辰及午意竟不移今日再見懇論盡詞往復勢既難拒恐失事宜卽於今月五日令臣與張荐分背便發彷徨中路憂懼實深魂魄震驚進退無據謹勒某官某乙陳奏以聞謹奏

代李中丞薦道州刺史呂溫狀

溫自作

右臣伏以前件官操履有恆吏事精舉處繁簡肅折獄詳明尤於撫綏實著效績今道州賦稅畢集流亡盡歸虔奉公程日至清淨委心於理古人不如衡州凋敝累年常積逋欠實藉財用以安疲黎伏望除衡州刺史臣職當廉察上奉詔條觀善薦能臣合竭節七州之事敢不精詳前件官小心理務夙夜奉公才識出人效績尤著况道州風俗獷猾前後難爲緝綏自溫條理已來疲人盡皆蘇息觀其能政堪爲表儀臣輒舉所職上達聖聰伏望天恩允臣所

請

功臣恕死議

昔衛蒯聵以竊國之詐盟其陪臣服冕乘軒三死無與近代惑者因爲口實於是乎有功臣恕死之典考諸古訓其異端歟稽諸時事其亂本歟何者有國之柄莫大乎刑賞人生有欲不可以不制天討有罪不可以不刑蓋刑者聖王所以佐道德而齊天下者也功濟乎物不可以不賞賞勸乎功不可以不信蓋信者聖人所以一號令而惇天下者也然則恕死之典棄信而廢刑何以言之夫立功者自

八元十亂之後非盡能賢或有起屠販壟畝行陣之間乘  
帝王應天順人之勢用力無幾遂貪天功超騰風雲各得  
變化率勞怙寵崛強自負僭冒無厭見利忘義是宜崇威  
峻法大爲之防而反丹書鐵券許以不死其功大者可以  
五作亂而十犯上孰不以暴爲無傷乎且人君之言如渙  
汗不反旣與之要天地誓山河卒一旦失馭有黥韓之罪  
神怒人怨不得已而誅是棄信也若恣行兇險隳突憲綱  
或姦鋒將發釁逼宗社乃念斯言之玷忍而不誅是廢刑  
也向者纔得其塵涓之勞螢燭之助而信棄刑廢將焉用

之使賢而有功驚寵懼滿自居無過之地何怨死爲使愚而有功小人不幸又告以無死是增驕而啟奸適所謂賞之禍也雖怨之死其能免乎夫其賢如太公忠如伊尹惟君知臣可以勿貳而遽宥以罪死是逆其不忠非所以待之以誠而盡君子之心也若乃猾如狗盜庸如黥徒未有罪而先怨之死是不許其慕生廉恥自固名節非所以道之以德而勸小人之善也以爲明君之處勞臣也安之以爵祿拘之以紀律明之以好惡聳之以禍福使得遷善遠罪保勳全名剖符傳慶與國終始恩斯勤斯是亦極矣奈

何撓權亂法以罪寵人墜信賞必罰之典虧昭德塞違之道恐非哲王經邦軌物之制也謹議

復漢以粟爲賞罰議

議曰先王賞以飾喜罰以飾怒喜必待功而賞不僭行怒必得罪而罰無輕赦其來尚矣漢室雜霸道而隳王制昧宏規而徇小利俾人納粟除罪拜爵以罰人則廢法以賞人則廢功以儲蓄則廢本是阻勞惠奸而怠棄南畝也何以言之惟名與器不可假人而班爵於兼并之家析圭於滯積之室使屠沽賤隸陵駕英豪苟有懷廉恥之心豈復



致患難之死雖月要天地日誓山河而賞不足以勸矣天  
討有罪刑茲無赦而撓權於殘賊之徒屈法於奸宄之黨  
使兇人酷吏言暴無傷苟開必免之門孰懲罔極之惡雖  
臨以斧鉞驅於鼎鑊而刑不足以威矣且朝縻好爵以粟  
授受國有常刑以粟出入貪利愛生之夫孰不願空壘畝  
而貨圭組竭倉廩而救死亡拜爵者坐等封君遂忘其本  
業免罪者室如懸磬曷保其生聚雖使三公九卿躬執耒  
耜而嗇不可以務矣於戲賞罰者君人之大柄農嗇者爲  
國之永圖忽而棄焉曾不是念而利乎國儲之匱實兵食

之僅濟其何補歟然而漢承秦弊中國耗弱高惠務厥完  
輯孝文守以恭儉德未浹於海外威未行於四夷邊候猶  
聞擊柝戎士不得解甲晁錯是以有權宜之對救弊之術  
偷利於當代幸成於一時雖曰有因而爲終貽識者之誚  
國家體元御極繼天而作騰軼殷周紹休唐虞率我蒸人  
登於壽域王一變至於帝帝一變至於皇非大道之謨不  
聽非聖德之猷不問焉有襲近古之失策采庸臣之詭論  
者哉必患國廩猶虛邊餽未繼莫若興李愬之平糴務充  
國之屯田練將簡兵以省軍費輕徭薄賦以悅人心東作

一興西成再秩則太倉之蓄如京矣塞下之稼如雲矣亦何必虧昭德塞違之道墜信賞必罰之典恐非聖唐經邦軌物之制也謹議

請立舜廟奏

右臣謹按地圖舜陵在九嶷之山舜廟在太陽之溪舜陵古者已失太陽溪今不知處秦漢以來置廟山下年代寢遠祠宇不存每有詔書令州縣致祭奠酬荒野恭命而已豈有盛德大業百王師表沒投荒裔陵廟皆無臣謹遵舊制於州西山上已立廟訖特望天恩許蠲免近廟三五家

令歲時埽灑以爲恆式豈獨表聖人至德及於萬代實欲彰陛下元澤被於無窮謹錄奏聞

代竇中丞與襄陽于相公書

某經術無取邱園自屏所期全拙豈敢近名二十五丈汎愛博容不遺孤陋申以通家之好遇以國士之禮分慚入堂契辱忘年猥蒙吹噓謬假鱗翼遂得價重江左名聞天朝起家拾遺再命柱史時丁變故命偶屯艱孤鱗方困於蹄涔窮鳥思歸於仁德果蒙奏領列郡擢倅三軍不汝疵瑕見容於歲月同我休戚每形於話言身計皆奉良規家

事悉資全力然後表達宸聽推致周行南宮劇曹踐不終  
歲憲府雄秩拔於常倫內顧庸虛敢云自致魏賢子夏宣  
尼之道彌彰漢用淮陰相國之言始重徒以才負知己名  
懸古人致遠之效莫彰貽羞之責斯及敢不砥礪微分激  
昂前途以明主今日之恩資大賢積時之譽庶乎有立少  
答所知豈敢以尺素爲榮而負平生之論伏惟有以鑒察  
郡榻諸生戎旃故吏推獎恩重生成感深瞻望門闌未獲  
拜謝銘戴兢惕莫知所裁拳拳下情紙墨難具某再拜

代李侍郎與山南嚴僕射書

僕射稟天全才受國重寄控全蜀咽喉之地當狂寇奔侮  
之衝治瘠土而其材甚豐訓羸師而其武可畏少分麾下  
潛運掌中再開劍閣之扃繼獻鹽亭之捷應接制使先假  
地征犄角王師且爲鄉道削叛臣之跡釋梓州之圍勞實  
居多功無與讓聖上神武睿斷注意西南一校之善否必  
知一夫之勞逸必察况閣下效彰朝論事布人謠精誠貫  
於神祇茂伐懸於日月豈復聽簿書之微巧詆笙簧之濫  
音來示所虞無足介意某以寡薄謬膺重任舉關國計動  
屬軍期夙夜憂慚未知所濟過蒙稱獎愧惕良深惟托方

岳至公共守王度物佑小事固無二三許共遵行亦如受  
賜佩荷之至無喻下情某再拜

代李侍郎與徐州張尚書書

奉別紙示諭眷待殊異規略端明究忠義之苦言暢經通  
之雅旨皆足以感動朝野光映古今一字之貴可懸於千  
金終身佩之何啻於三復甚善甚善伏以尚書才膺間出  
識蘊生知地承勲德行在詩禮自家達國移孝爲忠受任  
先朝克荷崇構控喉襟之地成節制之師動必勤王志皆  
憂國忠實彰於行事義聲感於旁鄰布在人謠溢於時論

鳴鶴有和鼓鐘必聞聖上神武聰明維新覆幬勵精戎事  
注意藩隅方仄陋以旁求况勲賢之自著何患乎誠不上  
達道不大光宣太阿之利用窮彝鼎之盛烈者乎某以寡  
薄謬膺寄任成賦之重撫事知慚徒欲盡愚衷悉陳鄙見  
策朽磨鈍庶效涓埃竭誠捐軀少酬恩遇知我者寡同志  
實難頃在江西過辱厚意常懷慕仰頗厯歲時昨者以私  
鹽干禁漸耗公利汴州滯運屢稽軍期忝當職司每積憂  
負輒率誠懇麤申條例網羅盜販節宣通渠實托眾賢敢  
專獨見果蒙宏至公之量推急病之心率先侯伯首贊王



度許以別設方略大爲隄防究絕姦源通利國漕神之聽  
之言可復於天地有始有卒事必立於邦家佇觀莫大  
功以成不朽之美諸侯師表天子腹心千載一時誠無以  
讓某奉職之分受賜宏多拳拳寸誠夙夜欣企幸甚幸甚  
徐儻宜並在使者口述伏惟照悉

代辛將軍與普潤劉尚書書

某性質鄙昧智能無取承藉門緒早蒙驅策盡瘁軍府備  
嘗艱險徒竭犬馬之勞詎濟弓裘之美家構未克國恩未  
酬而謬典禁司職惟侍衛良時自晚宿志莫申憤血猶剛

憂髮先白加以稟性寡合知音實難甘心此生長鳴靡託  
豈料尚書推宏深之量啟特達之心愛念不遺眷知益重  
昨者四牡來覲萬乘虛襟旁求將帥之臣佇清至公之鑒  
然則蕭何之稱必在韓信孝文有問宜薦雲中而丹墀對  
敷首及庸瑣敷陳本末獎飾逾涯達其忠義之誠許其遠  
大之致雖躬論志業自慙肺肝纖悉周詳豈能及此遂使  
鬱堙之志允達於宸聰樗朽之材式孚於帝念言發九天  
之上聲聞四海之中行得舟航坐生羽翼雖管鮑在齊載  
深知我之感王貢仕漢有切彈冠之善方諸今日未足爲

金史卷之二十一  
名臣列傳二十一  
喻不圖知己之至於斯義激血誠恩纏骨髓每一念至不  
覺涕流殞首糜軀豈能報德唯當竭誠砥節服義懷仁奉  
以周旋居之造次貞松得地方見於歲寒皦日在天願明  
其心誓死生幸甚幸甚屬有負薪之疾未申拜賜之禮瞻  
荷之至感懼兼深拳拳下情未知所措稍任行李卽冀趨  
謁伏惟照察

代李侍郎與宣武韓司空書

某以非才謬當重任事關國計動限軍期撫事知難夙夜  
憂積蓋以運路擁滯私鹽撓法力非有司所及唯託方鎮

至公伏惟司空文武全才勲德茂著朝廷毗倚中外具瞻  
勤王則知無不爲憂國則言皆可復今春過日獲拜旄麾  
眷私之餘已列此事蒙許同志立法叶力徇公對敷之初  
便具聞奏所以遣裴郎中往申朝旨議立規模悉令諮託  
大賢非敢專行鄙見昨得巡院狀報伏承司空德量旁通  
忠誠感發急公家之病同職司之憂鹽法隄防已行文牒  
斗門開塞許有商量率先諸侯首贊王度義形九牧忠動  
三軍意開而遠近承風言發而神明知感况某奉職之分  
承眷之深受賜懷仁豈同常等銘戴所至無喻下情

上族叔齊河南書

大尹叔父閣下某聞水官修而龍至官失其方物乃坻伏以文章而言則先進爲後進之官也亦宜正褻貶別雅鄭宣六義合三變以修其官使後進之徒靡然向風皦然知方能者勸不能者止於是乎文章之可見也如掃除氛昏澄定波濤穹天清而日月耀滄海晏而蓬壺出今夫先進之廢官久矣文猶龍也其可見乎伏惟叔父蘊特進之明哀雅頌之缺常欲以三代制度訓斯文前罷鎮南服入侍東掖詞林聳仰如日登觀莫不結轍連駟懷編捧軸差池

道路奔走光塵人人自以爲齊公之遇矣及乎昌言金馬  
高議承明懸大雅之衡以權後進則乃以小子爲稱首達  
勾萌而茂以柯葉翼鵲驚而使之頡頏先達改觀同類駭  
聽譽動朝端聲馳轂下循顧反覆誠非所堪竊料叔父之  
意豈不欲使濫音竊吹者聞士會而西逃秦境敦行守正  
者望郭隗而北首燕路夫如是則小子敢賀天下文章廢  
而復興不敢自當其遇也然大匠雖哲不能化擁腫之材  
大風雖壯不能起凝滯之物曩充鄉賦薦辱公議昨詔賢  
良猥塵清舉叔父以唱高寡和小子以名浮易喪間關堙

鬱卒用無成取笑薄徒貽羞左右雖失鵠而知反終胡顏  
而敢安愧懼慚惶夙夜若厲叔父蹈中庸之德遭兼濟之  
運荷深知於明主懸大望於蒼生一朝秉唐之鈞埏埴萬  
物而高明不奪於獨見鄙分克彰於日新茫茫前途未敢  
自料豈遽以一第爲得喪哉由是思之勃焉增氣遂欲攝  
迹聲利潛心道藝窮六籍之統紀盡三變之形容使學通  
天人文正雅俗然後抗衡當代爲叔父之榮雖知其難志  
不可奪謹獻近文七首徒跂聖人之域未臻作者之方姑  
務自強式酬與進伏願特紆省覽光賜教誨指以遠蹤責

以大成惠何加焉非敢望也

與族兄皋請學春秋書

儒風不振久矣某生於百代之下不顧昧劣凜然有志翹企聖域莫知所從如仰高山臨大川未獲梯航而欲濟乎深臻乎極也凡學之道嚴師爲難師資道喪八百年矣自鳳鳥不至麒麟遇獲血流戰國火發暴秦先王之道幾隕於地賴漢氏勃焉而拯之醜糟粕揚煨燼披雲霧揭日月夫子文章滅而復耀與火德俱朗者四百餘年當時大教中興去聖未遠學士非師說不敢輒言鴻儒碩生樂以善



誘宏道雖爲公卿教授不輟其徒大者至千餘人小者亦數百人或升乎堂或入於室洋洋濟濟有古風也夫學者豈徒受章句而已蓋必求所以化人日日新又日新以至乎終身夫教者豈徒博文字而已蓋必本之以忠孝申之以禮義敦之以信讓激之以廉恥過則匡之失則更之如切如磋如琢如磨以至乎無瑕故兩漢多名臣諫諍之風同乎三代蓋由其身受師保之教誨朋友之箴誡既知己之損益不忍觀人之成敗也魏晉之後其風大壞學者皆以不師爲天縱獨學爲生知譯疏翻音執疑護失率乃私

意攻乎異端以諷誦章句爲精以穿鑿文字爲奧至於聖  
賢之微旨教化之大本人倫之紀律王道之根源則蕩然  
莫知所措矣其先進者亦以教授爲鄙公卿大夫恥爲人  
師至使鄉校之老人呼以先生則勃然動色痛乎風俗之  
移人也如是是以今之君子事君者不諫諍與人交者無  
切磋蓋由其身不受師保之教誨朋友之箴規旣不知已  
之損益惡肯顧人之成敗乎而今而後乃知不師不友之  
人不可與爲政而論交矣且不師者廢學之漸也恐數百  
年後又不及於今日則我先師之道其隕於深泉是用終

日不食終夜不寢馳古今而慷慨抱文籍而太息吾兄亦曾以是爲念乎小子狂簡實有微志蘊童蒙求我之願立朝聞夕死之誓所與者不唯鴻碩之老博洽之士與我同志者則爲吾師與兄略言其志也其所貴乎道者六其詩書禮樂大易春秋歟人皆知之鄙尚或異所曰禮者非酌獻酬酢之數周旋裼襲之容也必可以經乾坤運陰陽管人情措天下者某願學焉所曰樂者非綴兆屈伸之度鏗鏘鼓舞之節也必可以厚風俗仁鬼神熙元精茂萬物者某願學焉所曰易者非揲著演數之妙畫卦舉繇之能也

必可以正性命觀化元貫衆妙貞夫一者某願學焉所曰  
書者非古今文字之舛大小章句之異也必可以辯帝王  
稽道德補大政建皇極者某願學焉所曰詩者非山川風  
土之狀草木鳥獸之名也必可以警暴虐刺淫昏全君親  
盡忠孝者某願學焉所曰春秋者非戰爭攻伐之事聘享  
盟會之儀也必可以尊天子討諸侯正華夷繩賊亂者某  
願學焉此外非聖人所論不與於君臣父子之際雖欲博  
聞不敢學矣吾兄達者也可不曰然乎嘗閱雅論深於春  
秋其間所得實曰淵正竊不自揣願以春秋三傳執樞衣

之禮於左右童蒙求我兄得辭乎朝聞夕死某可逆乎無  
以流俗所輕而忽賢聖之所重也其餘五經當今孰可爲  
某師者幸詳鄙志而與擇焉

欽定全唐文卷六百二十八目錄

呂溫四

送薛大信歸臨晉序

送友人遊蜀序

漢輿地圖序

地志圖序

道州律令要錄序

三月三日茶宴序

聯句詩序

送琴客搖兼濟東歸便道謁王虢州序

裴氏海昏集序

道州刺史廳後記

湖南都團練副使廳壁記

諸葛武侯廟記

虢州三堂記

人文化成論

三不欺先後論

欽定全唐文卷六百二十八

呂溫 四

送薛大信歸臨晉序

先師曰益者三友吾能得之豈惟直諒多聞而已可以旁  
魄天人談堯舜之道則有吾族兄皋可以根本性情語顏  
夷之行則有太原王師簡可以發揚古訓論三代之文則  
有河東薛大信此三君子或道以樂我或行以約我或文  
以博我遭時則有光遁世則無悶其爲益也不亦大乎大  
信與予最舊始以孝弟餘力皆學於廣陵之靈巖寺雲卷



其身討論數歲常見大信述作必根乎六經取禮之簡樂之易詩之比興書之典刑春秋之褒貶大易之變化錯落混合崢嶸特立不離聖域而逸軌絕塵不易雅制而瓌姿萬變有若雲起日觀盡成丹霞峰折靈掌無非峻勢皆天光朗映秀氣孤拔豈藻飾而削成者哉聖上方欲觀人之文潤色鴻業秉筆者如三光得天每賀大信有其時矣無何予被鄉曲之譽賦於闕下以文乖時體行失俗譽再爲有司所黜此時大信亦與計偕知機全高匣刃不試昔趙殺鳴犢仲尼臨河而逝予之見黜子亦逡巡事雖不同其

所感一也歲八月以岵岵之感告予于歸予思古人有處  
有贈乃語之曰吾聞賢者志其大者文爲道之飾道爲文  
之本專其飾則道喪反其本則文存且使不存又何傷矣  
彼邦是堯舜之遺俗唐叔之所理必有忠信如君者焉問  
安之暇可與之處琢磨仁義浸潤道德考皇王治亂之迹  
求聖哲行藏之旨達可以濟乎天下窮可以攄其光明無  
爲矻矻筆硯間也行矣大信苟非同志勿矢予言

送友人遊蜀序

始吾挹至源之貌若隴底積雪聳寒木於雲谿次吾覽至

源之文若驪龍相追弄明月於泉窟末吾聽至源之論若  
泰山欲雨倒雲氣於滄溟如其貌可以振肅周行如其文  
可以光潤石渠如其論可以感動宣室而淪蕩江海垂二  
十年則不知天所以生之之意貞元甲乙歲以親故勸勉  
來遊京師時然後言無辯以動眾樂然後笑無歡以接物  
義然後取無食以寧居慨然悔之決策長往因登紫閣峰  
而指曰西南青冥色連岷峨吾行何歸山盡則住翌日告  
別於友人太原王元運顧謂予曰高雲出岫無時雨之會  
與風悠揚轉遠而散若至源者其猶雲耶盍亦贈之序予

和汝

漢輿地圖序

輿地之有圖古也自成周大司徒掌天下土地之圖以周知廣輪之數而職方氏之圖復加詳焉迨漢滅秦蕭何先收其圖書始具知天下阨塞戶口多少之差然則尚矣武帝元狩六年將立三子爲王御史大夫奏輿地圖請所立國名乃開齊燕廣陵之封輿地圖之名至是始見史遷之所載可考也光武皇帝之徇河北鄧禹杖策而從之說以大策有天下不足定之語其後帝登城樓披輿地圖指示

禹曰天下郡國如是今乃得其一子前言天下不足定何也禹復申其說蓋光武志在天下當神州赤縣未入經略之際其君臣更相激厲如此故能兼制六合司空之所掌無寸地尺天不歸於封域按圖分封並建諸子以爲藩屏嗚呼盛哉用敢紬繹其意而爲之序曰自古合天下於一者必以撥亂之志爲主志之所向可以排山嶽倒江海開金石一念之烈無能禦之者光武之在河北崎嶇於封豕長蛇之間瞑目裂眚更相長雄積甲成山積血成川積氣成雲積聲成雷九流渾淆三綱反易雖十家之市無寧居

者則光武何所恃哉亦恃其撥亂之志而已光武之志以  
皇天全付所覆於我有漢今乃瓜分幅裂淪於盜賊此子  
孫之責也責之所在雖有登天之難不敢辭雖有暴虎之  
危不敢避雖有蹈風火之厄不敢回奮然直前以償吾祖  
宗之所付必使吾祖宗之舊物咸復其初然後吾責始塞  
焉此志一立故雖處一郡之地如視天下之廣慷慨憤悱  
氣干雲霄撥亂之志蓋肇於此矣方其志之未立則一郡  
至小而羣盜之地奚翅十倍吾衆至少而羣賊之兵奚翅  
十倍恢復之功猶捕風繫影若不可期者及既有其志則

規模先定幾謀先立兆之於前而必之於後若青若齊若隴若蜀若楚若越皆吾志中之一物也若盆子若王昌若囂若述若步若豐皆吾志中之臣僕也彼方繕寨置柵而不知吾已破之於掌上彼方裁冠被袞而不知吾已縛之於胸中是以論光武克復郡縣之蹟則有難易焉有先後焉若夫光武恢復之志則一披輿圖而萬里之幅員皆入於靈府豈嘗得一邑而始思得一州得一州而始思得一部大矣光武之志也斯其所以祀漢配天不失舊物歟厥後建武二十二年匈奴右賢韃日逐王比遣使奉匈奴地

圖二十四年北款五原塞願爲藩蔽迺立之爲南單于俾  
預藩臣之列是知光武有一天下之志非特輿地圖之所  
紀皆爲臣妾而匈奴地圖之所紀亦爲臣妾焉則志也者  
其撥亂濟世之樞極歟故述之以告來者

### 地志圖序

廣陵李該博達之士也學無不通尤好地理患其書多門  
厯世浸廣文詞浩蕩學者疲老由是以獨見之明法先聖  
之制黜諸子之傳記述仲尼之職方會源流考同異務該  
暢從體要倬然勒成一家之說猶懼其奧未足以昭啟後



生乃裂素爲方儀據書而圖畫隨方面以區別擬形容而  
訓解命之曰地志圖觀其粉散百川黛凝羣山元氣剖判  
成乎筆端任土之毛有生之類大鈞變化不出其意然後  
列以城郭羅乎陬落內自五侯九伯外洎要荒蠻貊禹跡  
之所窮漢驛之所通五色相宣萬邦錯峙毫釐之差而下  
正乎封略方寸之界而上當乎分野乾象坤勢炳焉可觀  
與夫聚米擬其端倪畫地陳乎梗槩固不可同年而語其  
詳略也每虛室燕居薄帷晴褰普天之下盡在屋壁戶納  
四海窗籠八極名山大川隨顧奔走殊方絕域舉意而到

高視華裔坐橫古今觀帝王之疆理見宇宙之寥廓出遐  
入幽曾不崇朝與夫役形神於歲月窮轍跡於區外又不  
可並軌而論勞逸也且夫刪百代之弊綜羣言之首繁而  
不亂疎而不漏才識以潤之丹青以炳之使嗜學之徒未  
披文而見義不由戶而觀奧斯訓導之明也窮地而述舉  
世而載事極鴻纖理通皦昧混一家之文軌張大國之襟  
帶覈人物之虛實總山川之要會表皇威之有截明王道  
之無外斯乃功用之大也見蒼梧塗山則思舜禹恤民之  
艱覩窮邊大漠則悟秦漢勞師之弊覽齊墟晉壤則見桓

文勤王之霸觀洞庭荆門則知苗蜀恃險之敗王者於是明乎得失諸侯於是鑒於興替斯又懲勸之遠也然則本之所以廣學流申之足以贊鴻業垂之可以示後世豈徒由近觀遠以智自樂爲室中之一物哉而時無知音道不虛行舉地成圖聞天無路此志士儒林所以爲之歎息也某久從君遊辱命序述庶明作者之意俾好事君子知其所以然

道州律令要錄序

某頃累忝官尚書省御史臺徧觀諸曹多書令式格律於

其屋壁苟非以宦遊爲情而奉其職者皆得日夕省覽卧  
起出入目存心悟纍纍然如貫珠如循環吏無以欺臨事  
不惑決繁滯舉枉直而協於大中中人以上固可馴致吾  
不知其誰首之何前賢處心恤事之周也若州縣者卑而  
近於人遠而切於得失動有懸人命關風俗而惰者委成  
於一吏望空而署勤者檢閱而山積神憤氣沮卒無所歸  
致政之弊不亦宜乎此州法吏何洛庭良吏也與之撮其  
要講其義書於廳事之左某不深於法猶慮未盡後來君  
子其究成之此長人者之所急

三月三日茶宴序

三月三日上巳禊飲之日也諸子議以茶酌而代焉迺撥  
花砌憩庭陰清風逐人日色留興卧指青靄坐攀香枝閒  
鶯近席而未飛紅藥拂衣而不散迺命酌香沫浮素杯殷  
凝琥珀之色不令人醉微覺清思雖五雲仙漿無復加也  
座右才子南陽鄒子高陽許侯與二三子頃爲塵外之賞  
而曷不言詩矣

聯句詩序

河東柳茂直與予有潘楊之睦且道義相得也予兄弟志

守拙默不交當世晨昏之外靖專一室顧我者唯茂直而  
已以爲切磋蓋常事討論有宴息導志氣徒然起憤議世  
事予欲無言其或晴天曠景浩蕩多思永夜高月耿耿不  
寐或風露初曉恍若有得或烟雨如晦緬懷所思則何以  
節宣慘舒暢達情性其有易於詩乎乃因翰墨之餘琴酒  
之暇屬物命篇聯珠迭唱審韻諧律同聲相應研情比象  
造境皆會亦猶衆壑合注浸爲大川羣山出雲混成一氣  
朗宣五色微闡六義雖小道必有可觀其在茲矣茂直命  
予序述存以編簡俾後之觀者知吾黨所立之濫觴

送琴客搖兼濟東歸便道謁王虢州序

東海搖兼濟年十三從淮南大軍有奇童之稱歲旣冠歷  
泗上劇職振能吏之聲而尚氣節重言諾臨財廉見義勇  
蘊崇具美發以雅琴琅琅然若佩玉之有衝牙也貞元丁  
丑歲觀藝京師冲宇罕窺正聲寡聽道不苟合浩然東歸  
水流無心遇用則止宏農守御史中丞王公得子最深且  
東諸侯之望也儻羽翼吾道鏗鏘爾音飛而鳴之一日千  
里則何公門不可曳長裾乎大丈夫風波未始有極生死  
且不足問況能離憂乎白露降秋雲起仰見太華壯心勃

興若不激徵變商是孤慷慨吾季恭也詩有逸氣盍韻鍾律播於絲桐

裴氏海昏集序

海昏集者有唐文行之臣故度支郎中專判度支事贈尚書左僕射正平郡公裴氏諱某字某考地毓德會友輔仁氣志如神英華發外之所由作也初公違河洛之難以其族行攀大別浮彭蠡望洞庭徘徊乎湓流眄仰乎海昏有歐山之奇修江之清陽溪之邃湯泉之靈竹洞花塢仙壇僧舍雞犬鐘梵相聞於青嵐白雲中數百里不絕時也俗



以遠而未擾地以偏而獲寧開元之遺老盡在猶歌詠乎  
太平公悠然樂之遂與我外王父故屯田郎中集賢殿學  
士河東柳公諱某外叔祖故相國宜城伯諱渾洎故太常  
卿蘭陵蕭公定故祕書少監范陽盧公虛舟故左庶子隴  
西李公勛爲塵外之交極心期之賞唯故給事中汝南袁  
公高故將作監河南元公亘以後進預焉江左搢紳諸生  
望之如神仙邈不可及每賦一泉題一石毫墨未乾傳詠  
已徧其爲物情所注慕如此無何朝廷命公盈虛東南漕  
引吳楚中原百萬之衆仰食於公人不堪煩我若無事往

往佩聯印擁大蓋枉道而過舊山林壑之間琴詩不廢心  
計頤指而軍國飫贍其大雅之全才者歟於戲太尉侍中  
勤勞王家惠於生人至公再世又以盛德屈於年運慶如  
壅川其決必大由是焜耀之烈重集於我郇公郇公始以  
大孝聞中以大用顯次以大忠升藩屏三朝出入二揆述  
先職而掌邦賦修祖德而踐台衡理荆之政篆在樂石定  
蜀之武藏在冊府漢南之化方洽於人謠加以優游藝文  
惇悅經術身被華衮門全素風不畏強禦不侮孤賤久要  
皆當代長者推轂必一時俊傑海內士大夫如鱗羽之歸

龍鳳君子曰憲公忠獻公之勲德節公之雅道爲不亡矣  
邨公以霜露之感泣編遺文思所以垂諸不朽以爲節公  
消息出處之道始於海昏遂於正集外別次當時唱和游  
覽餞勞之作凡九十六篇勒爲海昏集上下卷不遠三千  
里授簡於小生俾酌歸趣而爲序引某嘗備中臺之屬實  
辱至公之遇聞命已哀敬不敢文爲姑陳古義用贊風訓  
昔者三代陳詩以觀民風詐信淫義躁靜剛柔於是乎取  
之喜怒哀樂吉凶存亡於是乎觀之兆於此必應於彼成  
乎終必見乎始詩不可以爲僞魏公子爲南皮之游以浮

華相高故其詩傲蕩驕志勝而專勤而不安晉名士爲金谷之燕以邪侈相扇故其詩濫溺淫志冶而緩往而不返正平公爲海昏之會以禮義相誨故其詩恬淡退志莊直立志退以獨全其道立以兼濟於時立而不矜退而不怨適而不放樂而不荒親而不比數而不黷如切如磋婉而有直體曰比曰興近而有深致仁者見之遁世而無憂知者見之愛身而有待曖乎若冬陽之煦油乎若春澤之浸其誘人也易其感人也深卒不知其所以然也夫如是則觀南皮之詩應劉焉得不夭魏祚焉得不短觀金谷之詩

潘石焉得不誅晉室焉得不亂觀海昏之詩裴氏焉得不  
興我唐焉得不理詩之時義大矣哉天人家國之際其至  
矣哉爲節公郇公之子孫者其無忘哉

道州刺史廳後記

壁記非古也若冠綬命秩之差則有格令在山川風物之  
辨則有圖牒在所以爲之記者豈不欲述理道列賢不肖  
以訓於後庶中人以上得化其心焉代之作者率異於是  
或誇學名數或務工爲文居其官而自記者則媚已不居  
其官而代人記者則媚人春秋之旨蓋委地矣賢二千石

河南元結字次山自作道州刺史廳事記旣彰善而不黨亦指惡而不誣直舉胸臆用爲鑒戒昭昭吏師長在屋壁後之貪虐放肆以生人爲戲者獨不愧於心乎予自幼時讀古循吏傳慕其爲人以其爲士大夫立名於代無以高此前年冬由尚書刑部郎中出爲此州雖履劇自課而未能逮其意也往刺史有許子良者輒移元次山記於北牖下而以其文代之後亦有時號君子之清者莅此熟視焉而莫之改豈是非之際如是其難乎予也魯安知其他則命圻而書之俾復其舊且爲後記以廣次山之志云

湖南都團練副使廳壁記

湘中七郡羅壓上游右振犇蠻左馳甌越控交廣之戶牖  
扼吳蜀之咽喉翼張四隅襟束萬里半天下之安危繫焉  
聖唐理雖偃革制不去備消息變化必惟其時由是部分  
荆衡復古南鎮輕其兵徒而重其統帥易其將校而難其  
參佐所以顯仁藏用明道晦權成師於禮樂之中講武於  
文章之內雍容易簡四十餘年名跡風流冠於當代始則  
裴諫議虬以逸材奇略傲視而靜荒寇次則趙相公璟以  
高標雅望鬱起而爲國楨其餘馮郎中嶷之碩重房容州

孺復之英達鄭評事冽張著作季文之美秀洎張和州惟  
儉盧侍御解佐我先大夫宣慈明允實有成績是皆焯於  
朝論清在人謠者矣元和三年冬天子命御史中丞隴西  
李公以永嘉之清政京兆之懿則廷賜大旆俾綏衡湘威  
如秋霜無私凋惠如冬陽無私煦用人如止水無私鑒始  
下車表前副使殿中侍御史扶風竇君常字中行以本官  
復職於是監察御史河南穆君寂河內司馬君紆范陽盧  
君璠太常寺協律郎河東薛君存慶前咸陽縣尉吳郡顧  
君師閔前太子正字隴西李君礎前太常寺奉禮郎京兆



杜君周士前延陵縣尉同郡杜君寶羣材響附各以類至  
文雅器用歲餘大備錯金碧於晴壑粹孔翠於春林遐邇  
翕然稱爲盛府中行感會知己竭其誠能黃鐘音韻調於  
嶰谷之竹太阿鋒鏑拭以華山之土其吟鸞鳳斷犀兕不  
足怪也竇氏伯季同時七人一居方伯二列華省四在諸  
侯之館名教之樂摺紳慕焉以溫近守支郡且知故實得  
請連帥俾書公堂愧於不文安敢堅讓元和五年七月五  
日東平呂溫記

諸葛武侯廟記

天厭漢德俾絕其紐羣生墜塗四海飛水武侯命世實念  
皇極魏姦吳輕未獲我心胥宇南陽堅卧不起三顧雖晚  
羣雄初定必也彗掃是資鼎立變化消息謀成掌中戰龍  
元黃再得雲雨於是右揭如天之府左提用武之國因山  
分力與水合勢蟠亘萬里張爲龍形首吞咸鎬尾束河洛  
翼出中夏飛躍天衢然後魚驅向吳東入晏海大勳未集  
天奪其魄至誠無忘炳在日月烈氣不散長爲風雷英雄  
痛心六百年矣於戲以武侯之才知己託國土雖狹國以  
勤儉富民雖寡兵以節制強魏武旣沒晉宣非敵而戎馬

薦駕不復中原或曰奇謀非長則斬將覆軍無虛舉矣或曰餽糧不繼則築室反耕有成算矣嘗試念之頗蹟其原夫民無恆歸德以爲歸撫則思虐則忘其思也不可使忘其忘也不可使思當漢道方休哀平無政王莽乃欲憑威寵造符命脇之以威動之以神使人忘漢終不可得也及高光舊德與世衰遠桓靈流毒在人骨髓武侯乃欲開興圖振絕緒論之以本臨之以忠使人思漢卒亦不可得也向使武侯奉先主之命告天下曰我之舉也匪私劉宗唯活元元曹氏利汝乎吾事之曹氏害汝乎吾除之俾虐魏

偏從之民聳誠感動然後經武觀釁長驅義聲咸洛不足  
定矣奈何當至公之運而強人以私此猶力爭彼未心服  
勤而靡獲不亦宜乎乃知務開濟之業者未能審時定勢  
大順人心而克觀厥成吾不信也惜其才有餘而見未至  
迷於遺廟以俟通識唐貞元十四年七月十五日東平呂  
溫記

虢州三堂記

應龍乘風雲作雷雨退必蟠蛰以全其力君子役智能統  
機劇退必宴息以全其性力全則神化無窮性全則精用

不竭深山大澤其所以蟠蟄乎高齋清地其所以宴息乎  
號州三堂者君子宴息之境也開元初天子思二南之風  
並選宗英共持理柄號大而近匪親不居時惟五王出入  
相授承平易理逸政多暇考卜惟勝作爲三堂三者明臣  
子在三之節堂者勵宗室克構之義豈徒造適實亦垂訓  
居德樂善何其盛哉然當時漢同家人魯用王禮棟宇制  
度非諸侯居後刺史馬君錫因其頽陟始革基構豐而不  
侈約而不陋以琴尊詩書之幽素易綺紈鐘鼓之繁喧惟  
林池烟景不讓他日觀其廣踰百畝深入重局迴塘屈盤

沓島交映溟渤轉於環堵蓬壺起於中庭浩然天成熟曰  
智及春之日眾木花拆岸鋪島織沈浮照耀其水五色於  
是乎襲馨櫛奇方舟逶迤樂魚時翻飄藥雪飛泝沿迴環  
隱映差池咫尺迷路不知所歸此則武陵仙源未足以極  
幽絕也夏之日石寒水清松密竹深大柳起風甘棠垂陰  
於是乎濯纓漣漪解帶升堂畏景火雲隔林無光虛薨沈  
沈皓壁如霜羽扇不搖南軒清涼此則楚襄蘭臺未足以  
滌炎鬱也秋之日金飈掃林蒼鬱洞開太華爽氣出關而  
來於是乎弦琴端居景物廓如月委皓素水涵空虛鳥驚

寒沙露滴高梧境隨夜深疑與世殊此則庾公西樓未足  
以澹神慮也冬之日同雲千里大雪盈尺四眺無路三堂  
虛白於是乎置酒褰帷憑軒倚楹瑤階如銀玉樹羅生日  
暮天霽雲開月明冰泉潺潺終夜有聲此則子猷山陰未  
足以暢吟嘯也於戲不離軒冕而踐夷曠之域不出戶庭  
而獲江海之心趣近懸解跡同大隱序閱四時之勝節宣  
六氣之和貴而居之可曰厚矣若知其身旣安而思所以  
安人其性旣適而思所以適物不以自樂而忽鰥寡之苦  
不以自逸而忘稼穡之勤能推是心以惠境內則良二千

石也方今人亦勞止上思又息州郡之選重如廷臣由是南陽張公輟揮翰之任受剖符之寄遊刃而理此焉坐嘯靜政令若水木閒人民如魚鳥馴致其道闇然日彰小子以通家之好獲拜牀下且齒諸子侍坐於三堂見知惟文不敢無述捧筆避席請書堂陰俾後之人知此堂非止燕遊亦可以觀清靜爲政之道

### 人文化成論

易曰觀乎人文以化成天下能諷其言蓋有之矣未有明其義者也嘗試論之夫一二相生大鈞造物百化交錯六



氣節宣或陰闔而陽開或天經而地紀有聖作則實爲人  
文若乃夫以剛克妻以柔立父慈而教子孝而箴此室家  
之文也君以仁使臣臣以義事君予違汝弼獻可替否此  
朝廷之文也三公論道六卿分職九流異趣百揆同歸此  
官司之文也寬則人慢糾之以猛猛則人殘施之以寬寬  
以濟猛猛以濟寬此刑政之文也樂勝則流遏之以禮禮  
勝則離和之以樂與時消息因俗變通此教化之文也文  
者蓋言錯綜庶績藻繪人情如成文焉以致其理然則人  
文化成之義其在茲乎而近代詔諛之臣特以時君不能

則象乾坤祖述堯舜作化成天下之文乃以旂常冕服章  
句翰墨爲人文也遂使君人者浩然忘本沛然自得盛威  
儀以求至理坐吟詠而待升平流蕩因循敗而未悟不其  
痛歟必以旂常冕服爲人文則秦漢魏晉聲明文物禮縉  
五帝儀繁三王可曰煥乎其有文章矣何衰亂之多也必  
以章句翰墨爲人文則陳後主隋煬帝雍容綺靡洋溢編  
簡可曰文思安安矣何滅亡之速也覈之以名義研之以  
情實旣如彼較之以今古質之以成敗又如此傳不云乎  
經緯天地曰文禮不云乎文王以文治則文之時義大矣

哉焉可以名數末流雕蟲小伎廁雜其間乎

### 三不欺先後論

昔宓子賤爲單父也人不忍欺之國僑爲鄭也人不能欺之西門豹爲鄴也人不敢欺之此皆爲政不同同歸於理作幹事之稱首貽牧人之經範汪洋古今輝焯圖史窮理而語固有優劣擇善而行豈無先後請試論之子賤仕衰亂之魯而邑偏強齊仗義爲城池倚仁爲干櫓當鯨吞之大敵鳩狼顧之遺黎渙離形檢妙用心術惠訓不倦乃無得而稱視民如傷而不有其愛感而動之陰陽運於無言

誠而明之日月懸於方寸是則不求不欺於人而人不忍欺矣子產攝晉楚之間而靖恭爾位役智利物飭躬勵俗守之以信行之以禮告之以慈惠臨之以明察如鏡洞照如衡誠懸是則求人不欺而人亦不能欺矣西門豹當戰國之際而克修茂績身爲紀律言有典章剛包其柔威克厥愛權之以法制董之以刑罰火烈人望霜清物心是則責人不欺而人固不敢欺矣夫不忍欺者至誠潛感是曰上德堯舜之吏也不能欺者明智旁達是曰有政三王之吏也不敢欺者嚴威允濟是曰能刑五霸之吏也誠不足

至於智智不足至於威大小之間朗然可見然而事在折衷理資漸致德宜全舉道貴兼通必也修誠而棄智誠未至而致理或虧任智而廢威智未周而暴亂將起不若兼而行之迭收其效一之日二之日刑明威立使人畏而不能欺三之日四之日智達政成使人敬而不能欺五之日六之日志孚誠格使人感而不忍欺以寬濟猛同二氣之和乎自邇陟遐比三才之具美苟非全德大器其孰能至於此乎若不暇會其源流統其宗極而姑定優劣直論先後則堯舜之吏與王霸不同年而語矣

欽定全唐文卷六百二十九目錄

呂溫五

凌煙閣勳臣頌并序

狄梁公立廬陵王傳讚并序

續羊叔子傳讚

藥師如來繡像讚并序

張荊州畫讚并序

欽定全唐文卷六百二十九

呂溫五

凌煙閣勳臣頌并序

我二后受成命撫興運軋坤軸撼乾樞鼓元氣而雷域中  
騰百川而雨天下雲收雨霽如再開闢蕩蕩焉與太極同  
功貞觀十七年太宗以功成理定秉爲而不有之道讓德  
於祖考推勞於羣臣念匡濟於艱難感風雲於疇昔思所  
以攄之無窮乃詔有司擬其形容圖畫於凌煙閣者二十  
有四人蓋象乎二十四氣之佐天昭勳德也昔者舜以九

官致理周以十亂反正高皇以三傑祚漢光武以二十八將中興若夫錯綜勳賢牢籠今古雄四代而高視者其唯聖唐乎至若唐莒公劉渝公之倫探元符建帝圖首戴神堯舉晉陽而活天下此則大禹之拯溺也魏鄭公以致君爲已任諫若不及謇謇左右秉心宣猷此則咎繇之颺言也虞永興糾合羣儒旁求百代明備王禮克諧帝樂使我大國煥乎其有文章此則夷夔之制作也長孫趙公舉大義除二兇安宗廟定社稷以振我不赫無疆之休此則周公之匡救也英衛受天勇智雄武佐聖鼓行海內麾定四



方此則太公之鷹揚也房杜元機朗識並運帷幄神發響  
效謨成天功此則蕭何之指蹤子房之決勝也尉遲秦程  
剛毅木訥氣鎮三軍力崩大敵匹馬孤劍爲王前驅此則  
吳漢之樸忠賈復之雄勇也其餘皆懷棟殊材黼黻異制  
儔諸古烈罔有慚德皇王之業於斯爲盛其始也文爲經  
武爲緯智斯作忠斯述其末也大不偏小不過退者全來  
者達控而縱之使自用之推而引之使自盡之不設籠檻  
以觀寥廓之致不頓韁鎖以極權奇之變執一德而衆力  
展懸大信而羣情竭高祖取之以義太宗用之以道高宗

終之以仁傳聖萬代享其功利此非盛歟昔陸機袁宏爲  
晉人而歌功於漢魏作者猶或稱之况乎遊聖代觀國光  
目睨凌煙而頌聲不作某不揣賤劣有亶然之志輒盡所  
蓄各爲讚一章上以見王業之艱難中以明聖賢之相須  
次以朗前哲之光韻末以聳後人之盛節侯君集張亮負  
勲跋扈自陷大逆敢沒其名用彰天罰使伐勞懷貳者懼  
春秋之義異姓爲後故以河間元王爲讚首云

河間元王孝恭

太極構天本由一氣大人創業資我族類堂堂河間仁勇

是經遁駿有聲爲唐宗英暴隋天亡羣盜猖狂我伐用彰  
時維哲王武有烈光爲爪翼肺腸經綸八方自南徂東晏  
海澄江平蕭銳輔公祐使父兄帝天下化家爲邦用竭爾力寵臻  
其極言不伐色不德以遜以默柔嘉維則佐高祖建大勳  
如周旦奭與太宗守大成如漢間平宜君宜王盤石無疆

房梁公元齡

梁公先覺龍卧待君長彗流光掃天布新義師雷興公躍  
其鱗杖策千里來謁帝閭婉婉梁公實懿實聰實光實融  
羽義翼忠若鸞若鴻大風動地儒服從容靜運胸中弛張

折衝左右太宗夷屯廓蒙定高祖功告武成翊開太平  
我雖忘勞時靡有爭網羅遺賢推轂羣英玉不韜輝蘭無  
沈馨飛鴻出溟振鷺在庭濟濟多士太宗以寧太宗寧矣  
公無事矣闕袞有補惟仲山甫經營四方方叔召虎大邦  
鈞軸至則委汝閒居台輔撫默自處亦莫敢予侮高朗令  
終嗚呼梁公

杜萊公如晦

穆穆萊公奇資粹靈蘊元和氣爲大國楨乘時恢能唐室  
大開故人相攜少與房梁公同直上泰階更爲陰陽迭作

有匡濟之志也

日月佐明四海贊育萬物王度是欽如玉如金德音愔愔  
萬有千古永稱房杜如周申甫

### 魏鄭公徵

堂堂魏公崇節大志喬幹直聳摩天自致遭風雲時得霸  
王器一言委質有死無二撫我則后各盡其志

嘗事李密  
隱太子

沈浮變通吾道不窮龍戰既息皇建其極俾補衮職其繩  
則直諤諤疑疑危言正色保太宗德弼違替否日月不蝕

黜漢霸雜行周王道人或有言秉德不撓

與封德  
彝廷論

禮興樂

崇德洽道豐保太和昭明有融起四年中復三代風言

出化成神哉厥功伊躬佐商有恥於湯公以其志匡飭聖  
唐爲唐宗臣致唐無疆致唐無疆永式萬邦

長孫趙公無忌

趙國之先發祥朔土乃祖乃父受天之祐有女而聖

文德皇后

爲天下母有子而賢爲唐室輔聖賢同氣千載一覩丕顯

趙公允文允武克忠克仁實有大勲高祖受命太宗歸尊

翼翼乾乾恪居於藩羣孽亂嗣爭窺神器鴻業將墜公揭

大義一匡天地人到於今家受其賜帝將傳聖爰有顧命

汝忠汝誠莫與汝京爲我聖子守唐太平公相高宗有太

宗遺風刑措財豐八荒來同和氣大融妖星襲月禍起中  
宮公將正之以王帝躬武氏謀位公以力爭力屈羣邪誠阻天聰黜  
非其尤令問無窮

唐莒公儉

歲寒陰凝冰雪皚皚有鳥擇木先陽春來猗歟莒公王佐  
之材間運未開登潛龍臺代萬姓請命與天爲媒扶龍而  
興振起雲雷權輿帝圖經始唐基始覆一簣勃焉巍巍易  
失者時難知惟幾知幾其神莒公元勳

劉渝公政會

河出崑崙來潤中夏連山合沓橫擁其派巨靈勃然手擘  
太華決流東注功平造化粵我聖唐將舉晉陽帝命是將  
往拯溺於四方亦旣載旆亦旣秉鉞強兇當路拒不得發  
渝公慷慨感義激節用奇制變大事立決雷奮霆越天衢  
八達則莫我敢遏如巨靈破山河勢始豁赫矣渝公與神  
齊烈跡如仙掌炯炯不滅

李衛公靖

有隋之末羣盜熾熱帝怒震發五星從太白煥照參野將  
有聖人兵定天下金精下射猛毅感激李公矯矯從此奮



跡躍於中原王者則獲壯士不死

初公不利於我帝戮之壯其言而免壯士公自

稱

唐威載赫帝曰汝傑致天之罰手付金鉞俾往式遏不

庭則殺如飄發發如火烈烈摧枯爍雪應鼓如截遠若荆  
巫險若江湖強若匈奴莫不率從莫不震恭車書混同氛  
侵蕩空衛侯之功功則維何威明惠和策勇駕智長驅仁  
義仁義曠蕩帝王之將萬古曷瞻鐵山巉巉

### 李英公勣

橫流莫極大亂無象英公傑出應運爲將爲楚楚霸爲漢

漢王天時人事隨我所向長蛇縱蠱

王世充

東據河洛婪婪

封豕來濟同惡號吼連聲如雷如霆萬里震驚時維英公  
亮我太宗斬豕以鉞取蛇於穴羣穢殄滅乃定九鼎乃開  
明堂奄有大邦金甲同光告成於王  
太宗獻捷於高祖與  
勅俱櫟金甲爲上下  
將  
皇業用昌帝命英公北伐獫狁雷鼓殷殷旄頭幾殞掃  
雪黑山布唐陽春五原草綠不見南牧島夷未庭天子親  
征其鋒維英莫拒莫抗是震是蕩破東海浪天下旣和解  
鞍投戈袞服委蛇華髮皤皤終始三朝無玷可磨

劉夔公宏基

夔公崢嶸金虎之精應時而生與運俱行總帝元戎震唐

天聲瞪目張膽前無金城別建龍節中分虎旅啟行萬里  
乘氣一鼓劍揮雷霆旆卷風雨先馳咸陽鎮定天府天府  
既定唐集大命入揚王庭出權兵柄薄伐獫狁朔風不競  
徂征島夷東海如鏡義始忠卒元勳之盛

長孫邳公順德

泰山未明雲鬱幽崖日觀赫開舒爲丹霞昔我太原賢傑  
潛屯帝出於震爛其盈門邳公炳焉實耀其間功參造物  
謀協先天執爰前驅捧轂南轅以勞以舊佐命之元

虞永興公世南

英英永興華德素行以文富國以道佐命天下既定爲唐  
儒宗東觀石渠始生古風秉精繹思假道書圃驅馳百代  
出入三古問羲皇心聽堯舜語歸來帝側獻可替否帝告  
永興與鴻碩之倫闡六籍三墳建樂章禮文先師是宗於  
廓辟雍辟雍沈沈天子所臨或弦或歌講古述今其從八  
千纓弁森森獬豸髮咸詠德音羽林孤兒亦垂青衿洋  
洋聲教無遠不暨日月所臨皆成文字鬱開古始掃蕩澆  
季實我羣儒成太宗之志英英永興宜曰文懿公諡

尉遲鄂公敬德

洗洗鄂公百鍊龍泉沈鬱未宣氣衝斗間佩非其人

初事宋金

剛躍入大川神武獲焉提之上天天地之內指麾無前熊

威虎力隱若敵國剛毅木訥安劉必勃武德之屯手拔禍

根掃除氛昏捧出日月耀於天門功成名遂高謝戎事烈

烈猛志化爲和氣深地高堂頤性保常屑瓊飲露靜奏清

商商爲臣勵事君鄂公之德之勳

貞觀後公不交人事常鍊氣服食奏清商樂以

自娛

### 蕭宋公瑤

隋氏不君忠賢莫用桐生朝陽有集惟鳳捨彼頽廈鬱爲

新棟路車元袞開國有宋武德之暮羣孽內蠹巍巍宋公  
聳節高步不吐不茹不來不去屹屹中立爲天一柱從容  
而言社稷遂安持誠秉忠光輔二君激濁揚清欲人如身  
道至廣莫我敢羣境至大不容纖塵雪山倚空冰壑照人  
耿介絕倫爲唐貞臣

張鄭公公謹

有倬鄭公仡仡而貞洸洸而仁實太宗信臣太宗守藩內  
難未夷圖之則安捨之則危帝臨安危幾以懼以疑以著  
爲先知是筮是咨鄭公嶷然排闥折箸抗憤正詞用人事

定天意身爲元龜不知不識順帝之則以定社稷鄭公之力公之云亡帝念其勤若痛在身天懷發中哭不避辰君臣之間實古未聞

屈突蔣公通

五運相推土火革期隋化爲唐忠臣不知猶驅義徒奮拒王師指心誓天摩頸待時人歸有德四海皆叛春日滿川孤冰未泮亡家徇國方寸不亂力屈勢窮排空落翰東南慟哭聲盡魂斷杖忠就擒萬國瞻漢帝曰爾通古之烈士孝於其親誰不欲子俾侯於蔣授以師紀感恩不死宣力

如彼佐唐扶隋名教之美

高申公士廉

維嶽降神佐唐生申忠貞自天孝友如春德爲邦基仁厚

人倫肅肅雍雍真王者臣慶因歸妹光延天配

文德皇后公之同出

也婚媾之中雲龍潛會建功南海廓我無外涼武撥亂弼

文開泰遏彼庸蜀薦鍾澆季文翁之化若掃於地申公攸

徂有教無類父子兄弟望風相愧勃興儒雅大復禮義西

南頌聲到今不墜名登元勳理冠羣吏全材大器於爍厥

懿



殷鄖公開山

溫溫殷公初若懦夫銅印試吏褒衣爲儒大風驅雲忽與  
之俱遭逢真宰參造化謨天地旣闢厥功有赫從王龔行  
佐帝光宅遠展驥足高揮鳳翮以永終譽垂於竹帛

秦胡公叔寶

洛汭之役龍戰未決

我師與王世  
充陣於九曲

秦公應變臨陣電拔銳

氣盡來我盈彼竭成敗反掌存亡奄忽虎來風壯鼇轉山  
沒遂作心膂爰從討伐崩圍陷陣火迸冰裂翕如鶚聳縱  
若鯨突功成國定萬古壯骨

程盧公知節

盧公倬然動軼幾先轉禍爲福

與秦胡公降於九曲

攀龍上天續翻

鵬翼積風乃聳桓桓將軍大敵則勇雷崩山谷貔虎頓伏  
顛倒溟波鯨鯢蹉跎見危而進當死不讓干城三朝身老  
氣壯

段襄公志元

襄公虎臣先運而臻謁帝太原許唐以身擁劍駕氣騰風  
躍雲積忠累仁先有厥勳建旄北伐細柳宵屯風謐霜凝  
嚴局達晨天子之使駐車軍門安眾秉威此真將軍洗洗

桓桓克壯有聞

許譙公紹

羣動相食血流中原譙公夷陵豺虎爲鄰列境連城火炎  
烟昏皎其一邦如玉不焚三光忽開萬象皆新誰有天下  
平生故人公與高祖有舊引忠歸誠豹變蠖伸金石之契移爲君  
臣奕奕煌煌爲龍爲光元戎啟行大旆央央式遏大江奄  
征南方恩斯勤斯兩不可忘

狄梁公立盧陵王傳讚

并序

梁公以武氏篡盜國命如綴翊安宗社非我而誰是用蒙

大恥履大險聳節振美以持世心閑高祖天下於方寸之地盜力雖盛莫之敢闕唐復爲唐繫公是賴後代昧者頗歸功於五臣殊不知五臣之功公所授也客有以李北海所傳示予者述廬陵王廢立之際見公如生貽諸將來可以不惑敢攄憤而讚之詞曰

於休梁公社稷之臣濡跡應變與唐屈伸妖虹橫天鳴牝專晨獨立大道指南生人闔闢有期命先我時乃建國本代天張機取日虞淵洗光咸池潛授五龍夾之以飛臨終指麾皇業再基運起身後功成不知穆若清風巖然宏規

凡爲臣者可不度思

續羊叔子傳讚

天厭鼎峙蜀滅魏改錫晉羊公以同四海儒衣登壇嶽鎮  
荆蠻十萬之衆從公而閑逍遙峴陽傲視勅敵用仁爲間  
出入無跡吳國雖守吳心已降吞於胸中不見大江勤物  
忘已樂天知命留功遺人國愈身病江漢舊域德膏潛蒸  
化行兵中兵息化興策雖平吳道不相晉永嘉南遷豈曰  
泯泯

藥師如來繡像讚并序

藥師如來像者予妻蘭陵蕭氏之所繡也貞元二十年予奉德宗皇帝之命西使吐蕃辭高堂而出萬死介單車而馳不測國故遽至戎情猜閉坎險一遇星霜再周夫人盥饋之餘膏鉛不御日亂蓬首坐銷薜華異域無期良時自晚始怨冬釭之久而紅芳已闌方苦夏景之長而碧樹將落書委塵篋跡淪苔階漸昧音容孰知存沒黷龜不告因夢難徵觸慮成端沿情多緒黃昏望絕見偶語而生疑清旭意新聞疾行而誤喜循環何極刻舟靡尋浩隔理求宵非計得如聞西方有金界極樂藥師大雄散琉璃之寶光

照河沙之國土能度羣品出諸幽厄一念必應萬感皆通  
是用濬發慧根妙求真相斷鳴機躬織之素染懿筐手續  
之絲盡瘁莊嚴彰施綵繡纏苦心於香縷注精意於鍼鋒  
指下而露洗青蓮思盡而雲開白日然後練時潔室華設  
珍供夕炬傳照晨爐續煙齊獻至誠泣敷懇願遂得慈舟  
密濟覺路潛引當道場發念之日是荒裔來歸之辰幽贊  
冥符一何昭焯乃知織迴文之錦無補離憂登望歸之臺  
空爲廢日與夫心諧妙理手結勝因進則有濟度之功退  
不離清淨爲本從長擇善豈同日而言哉予感其志效爰

用贊敘雖在妻子亦無愧詞藏諸閨門永以傳信讚曰  
地萬理兮天一極往無由兮來不得解脫願兮慈悲力五  
色繡兮黃金飾澄氛昏兮圓相開湛水月兮蓮花臺慈眼  
睠兮獷心迴死別離兮生歸來海爲田兮劫爲灰身念念  
兮無窮哉

張荊州畫讚并序

中書令始興文獻公有唐之鯁亮臣也開元二十年後元  
宗春秋高矣以太平自致頗易天下綜覈稍怠推納寢廣  
君子小人摩肩於朝直聲遂寢邪氣始勝中興之業衰焉



公於是以生人爲身社稷自任抗危言而無所避秉大節而不可奪小必諫大必諍攀帝檻厯天階犯雷霆之威不霽不止日月之蝕爲公却明虎而冠者不敢猛視羣賢倚賴天下仰息凜乎千載之望矣不虞天將啟幽薊之禍俾姦臣負乘以速致戎詐成讒勝聖不能保褫我公袞寘於侯服身雖遠而諫愈切道旣塞而誠彌堅憂而不怨終老南國於戲功業見乎變而其變有二在否則通在泰則窮開元初天子新出艱難久憤荒政樂與羣下勵精致理於是乎有否極之變姚宋坐而乘之舉爲時要動中上急天

光照身宇宙在手勢若舟楫相得當洪流而鼓迅風崇朝  
萬里不足怪也開元末天子倦於勤而安其安高視穆清  
霈然大滿於是乎有泰極之變荊州起而扶之舉爲時害  
動拂上欲日與讒黨抗衡於交戟之中勢若微陽戰陰衝  
密雲而吐丹氣歛耀而滅又何難乎所痛者逢一時事一  
聖踐其跡執其柄而有可有不可有成有不成况乎差池  
草茅沈落光耀者復何言哉復何言哉曹溪沙門靈澈雖  
脫離世務而猶好正直得其圖像因以示予覩而感之乃  
作讚曰

唐有棟臣往矣其邈世傳遺像以覺後學德容恢異天骨  
峻擢波澄東溟日照太嶽具瞻崇崇起敬起忠貌與神會  
凜然生風氣蘊逆鱗色形匪躬當時曲直如在胸中鯢鱗  
初脫激海以化羊角中頽摩天而下無喜無愠亦如此畫  
嗚呼爲臣儆爾夙夜